

Konaković i Dautbegović posjetili Udruženje Obrazovanje gradi BiH

FENA
28.3.2016. u 20:03



Mogućnost podrške Kantona Sarajevo radu Udruženja "Obrazovanje gradi BiH" bio je povod današnje posjete tom udruženju kantonalnog premijera Elmedina Konakovića i ministrice za rad, socijalnu politiku, raseljena lica i izbjeglice Amele Dautbegović, saopćeno je iz kantonalne Preslužbe.

"Udruženje 'Obrazovanje gradi BiH' pomaže i stipendira djecu žrtava proteklog rata u BiH, djecu s invaliditetom i talentovanu djecu, nabavlja im školski pribor i sportsku opremu, štampa i prodaje godišnje kalendare te organizuje humanitarne koncerte i aukcije već 22 godine", pojasnila je tokom sastanka projekt menadžerica Udruženja Mersiha Turudija te navela i da je od 2005. godine, u realizaciji projekta "S obrazovanjem u budućnost", oko 1.240 romske djece dobilo stipendiju, a jedna djevojka je i magistrirala na Saobraćajnom fakultetu.

Osim navedenog projekta, Udruženje realizuje i druge, među njima ljetovanja i zimovanja svake godine za svu djecu neovisno o njihovoj nacionalnoj pripadnosti.

"Do sada su djeca posjetila 18 evropskih država, Kanadu i Urugvaj, te boravila na Boračkom jezeru. Ovaj projekt koji se realizuje od 1996. godine smatramo izuzetno značajnim jer ne samo da je kroz njega prošlo

3.927 učenika i učenica, nego im je omogućio da se socijalno integrišu kroz rekreaciju, učenje, zabavu i sport", rekao je član Upravnog odbora Udruženja Mehmed Agić.

Tokom sastanka je rečeno da je Udruženje od osnivanja stipendiralo 6.104 djece.

"Za njihove stipendije izdvojili smo oko 2.777.445 eura, a najveći dio obezbijedimo od prodaje kalendara. Svake godine prodamo od 25 do 30 hiljada kalendara i tako osiguramo 50-tak stipendija", kazao je izvršni direktor i osnivač Udruženja Jovan Divjak.

Informisao je prisutne da u posljednje četiri godine Udruženje pokušava naći odgovarajući prostor za izgradnju hostela u kojem bi boravila djeca njihovi stipendisti, a u Sarajevu su na školovanju.

Premijer Konaković naglasio je da će Vlada podržati kupovinu kalendara za narednu godinu, ali i svaki projekt ukoliko za to bude finansijskih sredstava.

Po njegovim riječima, rezultati Udruženja su odlični i Vladi je u interesu da s njim institucionalno saraduje, a to je između ostalog moguće i u projektima zapošljavanja i samozapošljavanja koje provodi kantonalna Služba za zapošljavanje.

Ministrica Dautbegović je navela da i resorno ministarstvo podržava projekte koji uključuju romsku populaciju, a sve s ciljem uključivanja Roma u svakodnevne društvene tokove.

U znak zahvalnosti, Jovan Divjak je gostima poklonio monografiju "Dvadeset godina u ozračju djece" i "Mapu odbrane Sarajeva".



